

Dr. Casper Lacle: "Open Hart Missie" ta importante pa futuro

Aruba lo conoce crecimiento di cantidad di pashent di curason

CARDIOLOGO dr. Casper Lacle tabata un di e specialistanan Arubano cu a forma parti di e team cu a traha duro riba e realisacion di e prome "Open Hart Missie" pa Aruba. E mision a encera hopi trabao di preparacion di parti di Dr. Horacio E. Oduber Hospitaal y tur e profesionalnan involvi. Algun luna pasa e mision a wordo realisa, unda cu un team di Hulanda, cu asistencia di un team di Aruba, a opera nueve pashent di Aruba na nos hospital.

Pa cu e proceso di e preparacion prome, e operacion mes y e cuidu, guia y control di e pashentnan despues di e operacion a mantene normanan estricto Hulandes di Nederlandse Vereniging voor Thoraxchirurgie.

Dr. Lacle a splica cu ta pa hopi aña e cardiologonan di Aruba tabata tin e deseo pa trata

e pashent mas posibel aki mes. Despues di basta preparacion, por ehempel Angioplastia Coronario, yama den boca di pueblo "habrimento di ader", ta un tratamiento invasivo cu ta wordo haci na Aruba mes awo. E ta un solucion pa pashentnan pa ken un operacion no ta necesario, pero si mester habri e ader cu un balon y pone un stent pa tene esaki habri, dr. Lacle a splica. Awendia pues no ta necesario pa e pashent biaha pa exterior mas pa e intervencion aki, e ta keda den su ambiente familiar y e por bay cas caba

su siguiente dia.

E procedura aki tambe a provee un solucion pa pashentnan cu ta drenta hospital cu un ataca di curason, o sea den un situacion hopi critico y asina ta logra salba nan bida sin tin mester di manda nan pa exterior cu air ambulance, etc. Dr. Lacle a expresa cu e posibilidad pa haci e procedura aki mes ta un adelanto grandi pa cu tratamiento di "coronary disease" na Aruba.

Uzando guianan internacional ta pronostica, considerando e cantidad grandi di pashent di presion halto y diabetes na Aruba, cu nos isla lo tin 230 pa 250 pashent local pa aña cu mester di angioplastia y un stent. Un tercer di e pashentnan lo sufri un ataca di curason of un pre-infarto di curason.

Awendia Aruba tin 100 pa 115 pashent pa aña cu ta wordo manda afo pa tratamento. Esaki ta un volumen abao, dr. Lacle a comenta, añadiendo cu den dos pa cuater aña esaki lo crece y den dos pa cuater aña Aruba lo tin un volumen grandi, esta 230 pa 250 pashent pa aña.

Cu e prome mision a "jump-start" algo cu ta hopi importante pa Aruba y cu tempo, ora cu e cantidad di pashent subi, e gastonan lo baha tambe y "a lo largo" lo sali mas barata pa haci e operacionnan y tratamiento nan

aki na Aruba mes, segun Lacle.

E especialista a observa cu, por ehempel, e pashent di mas edad cu a wordo opera durante e prome mision a bis'e cu e ta contento cu su operacion por a tuma lugá na Aruba mes, pasobra e lo a cana un caminda di cruz si e mester a bay wordo opera afo.

Dr. Lacle a subraya cu e control di calidad cu ta tumando lugá for di cuminsamento ta importante, como cu tur partner involvi kier pa e calidad ta bon. Na Aruba actualmente no tin un ciruhano cardiovascular, el a bisa, añadiendo cu aki dos aña - cu un pa dos operacion pa siman - si lo mester di uno y e funcion aki por wordo yena pa un persona of kisas hasta por wordo comparti pa dos of tres ciruhano cu ta traha na Aruba cada uno pa algun luna.

Dr. Lacle a bisa cu e calidad brinda na Aruba ta conta tambe cu aprobacion di parti di un di e

mediconan especialista di e team di Hulanda cu ta originalmente di Corsou, kende a expresa cu manera cu e mision a bay, e no tin ningun problema di opera su mesun tata aki na Dr. Horacio Oduber Hospitaal na lugá di e hospital unda cu e mes ta traha na Hulanda.

Documentario

Dr. Horacio E. Oduber Hospitaal ta invita comunidad henter pa sigui e desaroyo importante aki den e mundo medico na Aruba mas di cerca. Pa un miho idea di con e prome operacion a bay, sintonisa TeleAruba diahuebs awo, 25 di september, pa 7'or di anochi pa e documentario "Bo Curason...den nos man!"

E documentario, cu un duracion di 30 minuut, ta sigui e prome pashentnan cu a haci un "open hart operatie" na Aruba durante e proceso di preparacion, operacion y post-operacion, ilustrando momentonan di hopi emocion y curashi.

